

Plu ladin tla RAI

A la fin de dezember él vegnù fat fora che danter Provincia y RAI che i ladins dess giaté cotant plu ores de trasmissions tla televizion. Aumenc é prevedùs ence per l radio todesch



Jornalisć dla RAI Ladina. Giati pa finalmenter na redazion autonoma?

Televizion - Con plajej onse podù lieje che i ladins dess tantost giaté plu ores de trasmission per la televizion; an reiona de 100 ores empede 39 al ann per la televizion ladina y da 4.716 ores a 5.300 ores al ann per l radio todesch. Chest é vegnù fat fora en l "Dé Fantù" (ai 28 de dezember 2012) tla convenzion nueva per i agn dal 2013 al 2015 anter l govern de Bulsan y la presidenta dla RAI Maria Tarantola a Roma. La convenzion dij che les ores emplù che i ladins y i todesch giatarà, vegnirà paides da la Provincia de Bulsan, ma la competenza resta a Roma; chest vedova dantfora la

acordanza da Milan sotescrita da Roma y da Bulsan. Na comiscion paritetica anter Bulsan y la RAI da Roma sciacararà fora plu avisa sciche la convenzion dessa vegni aplichada per garanti n majer numer de trasmissions ladines y todesces. Chesta comiscion messesa vegni metuda adum da n ladin, da n todesch y da n talian dla RAI per ester paritetica y giusta per i trei grups etnics.

Da agn na ghiranza

Da trueps agn encà onse damané a la provincia de Bulsan che ala paie la RAI per avei deplù

ores de trasmissions ladines, ciuldi che Bulsan ti paia bele da agn al ORF la trasmission "Südtirol heute"! La RAI ova pu dit da giut che ala ne ova nia scioldi per plu trasmissions ma che Bulsan essa podù les paié.

Sen à Bulsan capì y vedù ite che chest é l troi plu segur per ti garanti ai ladins plu trasmissions tl radio y tla televizion, cie che ai se damana pu da prest 20 agn encà. Ma al sà empò de marevueia che ence i todesch giate deplù ores de trasmissions, scemia che ai à pu n grumon de canai televisifs per

va inant a plata 2

Plu ladin tla RAI

A la fin de dezember él vegnù fat fora che danter Provinzia y RAI che i ladins dess giaté cotant plu ores de trasmissions tla televizion. Aumenc é prevedùs ence per l radio todesch

va inant da la pruma plata

todesch olache ai pò scuté su trasmissions te sie lingaz dla oma, depierpul che i ladins à demé l radio y la televizion rumancia che ai pò audi y vedei. I ladins essa pa ben debuiegn de cotant de plu ores de trasmissions ladines. Penson demé che i rumanc pò scuté l radio rumanc 24 ores sun 24, di y nuet.

Al vuel ester plü personal

An spera che ence l radio ladin giate les ores de trasmiscion almanco radopleades y che duc i ladins dles Dolomites vegne traç ite a colaboré pro la RAI Ladina da Bulsan y che an veide les trasmissions ladines soura dut l raion ladin. Plu ores costa plu laour y perchel messaràl vegnì tout su tantost cotant deplù personal ladin cualifiché y independent da la politica de partit. N'otra ghiranza bele da n pez sun meisa é che al ti vegne conzedù ence ai ladins na redazion autonoma con n redadour responsabel empede l talian; chest fòssel gran ora da arjone sce an ne vuel nia tres ester dependenc dai autri che ne la mina pa nia massa bona con i ladins. Ala jissa ence saurì da sposté posc de laour dla RAI tles valedes ladines acioche chi che laora per la RAI Ladina possa sté te sia valeda empede jì a se perde fora per Bulsan y n'avei enscì puech y degun contat diret con sies valedes. Al ne volessa nia ester truep per enjigné ite valch ofize te valeda, n local y zacotant

de computer.

N saut de cualité

Plu ores de trasmissions per l radio y la televizion ladina comporta n saut de cualité tamben per cie che reverda la cualificazion profescionala dl personal che per i contegnus di programs. Deplù ores de trasmission vuel di valorisé l lingaz ladin, ti dé plu peis y na maiour fazion tla vita da vigni di y ti dé ocajion ai ladins da se fé audi cotant deplù tl radio y tla televizion. I ladins ne à mai abù la ocajion da lascé audi tl radio o tla televizion na discusion plu sota o na meisa torona plu lergia, n bel teater, n concert de cualité, informazions sun la vita economica y sozjala, sun l lingaz y la cultura, sun la leteratura y l'ert.

Stroment de identité

I ladins é tres stés sforzès da se scuté su di y nuet les trasmissions di autri lingac, cie che à daidé pro che nia puec ladins à metù man de adoré tres deplù parores forestes, sibe talianes che todesces. An auda ladins che rejona n ladin cotant bastardé; forza de audi ores al di demé trasmissions ti autri lingac ruva paroles forestes plu saurì tl ladin, ales toma ite plu atira y vegn perchel adoredes ence canche an essa paroles ladines da tò ca. Sce al vegn nuzé aladò pò l radio y la televizion ladina daidé pro cotant a renforzé l lingaz, la cultura y l'identité ladina. *(Lois Trebo/ev)*

